

1.王禹偁 村行

馬穿山徑菊初黃，信馬悠悠野興長。萬壑有聲含晚籟，數峰無語立斜陽。

棠梨葉落胭脂色，蕎麥花開白雪香。何事吟餘忽惆悵，村橋原樹似吾鄉。

2.寇準 書河上亭壁

岸闊檣稀波渺茫，獨憑危檻思何長。蕭蕭遠樹疏林外，一半秋山帶夕陽。

3.林逋 山園小梅

眾芳搖落獨暄妍，佔盡風情向小園。疏影橫斜水清淺，暗香浮動月黃昏。

霜禽欲下先偷眼，粉蝶如知合斷魂。幸有微吟可相狎，不須檀板共金樽。

4.郭震 紙窗

偏宜酥壁稱閒情，白似溪雲薄似冰。不是野人嫌月色，免教

風弄讀書燈。

5.晏殊 無題

油壁香車不再逢，峽雲無跡任西東。梨花院落溶溶月，柳絮池塘淡淡風。

幾日寂寥傷酒後，一番蕭瑟禁煙中。魚書欲寄何由達，水遠山長處處同。

6.梅堯臣 魯山山行

適與野情愜，千山高復低。好峰隨處改，幽徑獨行迷。
霜落熊升樹，林空鹿飲溪。人家在何許？雲外一聲雞。

7.歐陽脩 戲答元珍

春風疑不到天涯，二月山城未見花。殘雪壓枝猶有橘，凍雷驚筍欲抽芽。

夜聞歸雁生鄉思，病入新年感物華。曾是洛陽花下客，野芳雖晚不須嗟。

8.蘇舜欽 淮中晚泊犢頭

春陰垂野草青青，時有幽花一樹明。晚泊孤舟古祠下，滿川風雨看潮生。

9.王安石 泊船瓜洲

京口瓜洲一水間，鍾山只隔數重山。春風又綠江南岸，明月何時照我還。

10.程顥 春日偶成

雲淡風輕近午天，傍花隨柳過前川。時人不識余心樂，將謂偷閒學少年。

11.蘇軾 題西林壁

橫看成嶺側成峰，遠近高低各不同。不識廬山真面目，只緣身在此山中。

12.黃庭堅 寄黃幾復

我居北海君南海，寄雁傳書謝不能。桃李春風一杯酒，江湖夜雨十年燈。

持家但有四立壁，治國不蘄三折肱。想得讀書頭已白，隔溪

猿哭瘴煙藤。

13.秦觀 春日

一夕輕雷落萬絲，霽光浮瓦碧參差。有情芍藥含春淚，無力薔薇臥曉枝。

14.呂本中 別夜

薄酒殘燈欲別情，暗螢依草不能明。懸知先入他年話，一夜蛙聲連雨聲。

15.曾幾 三衢道中

梅子黃時日日晴，小溪泛盡卻山行。綠陰不減來時路，添得黃鸝四五聲。

16.陳與義 傷春

廟堂無策可平戎，坐使甘泉照夕峰。初怪上都聞戰馬，豈知窮海看飛龍。
孤臣霜發三千丈，每歲煙花一萬重。稍喜長沙向延閣，疲兵敢犯犬羊鋒。

17.陸游 遊山西村

莫笑農家臘酒渾，豐年留客足雞豚。山重水複疑無路，柳暗花明又一村。

簫鼓追隨春社近，衣冠簡樸古風存。從今若許閒乘月，拄杖無時夜叩門。

18.楊萬里 曉出淨慈寺送林子方

畢竟西湖六月中，風光不與四時同。接天蓮葉無窮碧，映日荷花別樣紅。

19.杜耒 寒夜

寒夜客來茶當酒，竹爐湯沸火初紅。尋常一樣窗前月，纔有梅花便不同。

20.范成大 早發竹下

結束晨妝破小寒，跨鞍聊得散疲頑。行衝薄薄輕輕霧，看放重重疊疊山。

碧穗炊煙當樹直，綠紋溪水趁橋灣。清禽百轉似迎客，正在

有情無思間。

21.朱熹 觀書有感

半畝方塘一鑿開，天光雲影共徘徊。問渠那得清如許，為有源頭活水來。

22.林升 題臨安邸

山外青山樓外樓，西湖歌舞幾時休？暖風薰得游人醉，直把杭州作汴州。

23.葉紹翁 游園不直

應憐屐齒印蒼苔，小扣柴扉久不開。滿園春色關不住，一枝紅杏出牆來。

24.趙師秀 約客

黃梅時節家家雨，青草池塘處處蛙。有約不來過夜半，閒敲棋子落燈花。

25.文天祥 金陵驛

草合離宮轉夕暉，孤雲飄泊復何依。山河風景元無異，城郭
人民半已非。

滿地蘆花和我老，舊家燕子傍誰飛。從今別卻江南路，化作
啼鶻帶血歸。